

DOMENIE IV DI PASCHE

Jutoris pe Liturgjie

Domenie, ai 22 di Avrîl dal 2018

Finore cuant che si cjacarave dal bon pastôr - Gjesù al disè: Jo o soi il bon pastôr - si pensave subit al pape, pastôr de glesie universâl, al vescul, pastôr de glesie diocesane, al plevan, pastôr de plêf o de parochie. Ma cumò lis robis a stan cambiant e si sta passant di une glesie monarchiche, piramidâl, a une glesie sinodâl dade dongje tai dons dal Spirt o carismis, fate di ministeris e di servizis, di ativitâts, come che al dîs S. Pauli: E je une diviersitât di dons, ma un Spirt sôl; e je une diviersitât di servizis, ma un Signôr sôl; e je une diviersitât di ativitâts, ma un Diu sôl, che al fâs dut in ducj. A ognidun i je dade la manifestazion dal Spirt pal ben di ducj (1 Cor 12, 4-7). Cussì, ancje la imagine dal bon pastôr no si ferme dome a une persone consacrade ma a ognun che al à te glesie un so puest.

Te nestre glesie diocesane, chest discors al deventarà simpri plui impuartant: ducj in cualchi maniere o varin di sintîsi pastôrs dongje dal Signôr, parcè che cence di lui no podin fâ nuie (Zn 15, 5); o varin di cjavâsi cualchi responsabilitât tal trop dai cristians, te comunitât dal paîs.

Prein il Spirtu Sant che al ilumini la nestre glesie e comunitâts in chest passaç a une gnove mentalitât, a un gnûf mût di “fâ glesie” e di impegnâsi insiemi.

Antifone di jentrade

cf. Sal 32,5-6

Dal boncûr dal Signôr e je incolme la tiere;
cu la sô peraule a son stâts fats i cîi, aleluia.

Si dîs Glorie a Diu.

Colete

Diu onipotent e eterni,
meninus a spartî la gjonde dal cîl,
par che l'umil trop dai fedêi al rivi
là che lu à precedût la fuarce dal pastôr.
Pal nestri Signôr Gjesù Crist to Fi, ch'al è Diu
e cun te al vîf e al regne dutune cul Spirtu Sant,
par ducj i secui dai secui.

PRIME LETURE

At 4,8-12

Diu al à fat Signôr e Crist chel Gjesù ch'o vês metût in crôs.

Vuê, impegnâsi tes nestris comunitâts cristianis, al pò ancje volê dî: cjavâsi come il Signôr pierre che le vês butade di bande. Però il nestri lavôr fat tal non di Gjesù Crist il Nazaren, al parteciparà de sô resurezion e glorie. Cul Signôr no si piert mai parcè che in nissun altri no 'nd è salvece.

Dai Ats dai Apestui

In chei dîs, Pieri, incolm di Spirtu Sant, ur disè: «Caporions dal popul e sorestants, parvie che vuê o sin cullî a rispuindi de opare fate a di un malât e di cemût ch'al è stât vuarît, o savarês ben ducj vualtris e dut il popul di Israel che chest om si presente vuarît denant di vualtris dome pal non di Gjesù Crist il Nazaren, che vualtris lu vês picjât su la crôs e che Diu lu à resussitât dai muarts. Al è lui “la pierre che vualtris muradôrs le vês butade di bande e ch'e je deventade il cjantonâl”.

Parcè che in nissun altri no 'nd è salvece; no 'nd è altri non sot dal cîl dât ai umign che midiant di lui o podin jessi salvâts».

Peraule di Diu.

SALM RESPONSORIÂL

dal Salm 117

Tal salm, il discors di Pieri de prime leture al devente ricognossince, si cambie in fiducie, si fâs contemplazion des oparis di Diu in Crist e, se o vin vôi par viodi, ancje te nestre vite. Alore, in chestis riflissions, il nestri cûr si sbroche insiemi cul salmist: A fâ dut chest al è stât il Signôr; e je une robonone pai nestrîs vôi.

R. La pierre che i muradôrs le vevin butade di bande cumò e je pierre di cjantonâl.

Se cjantât, Il cjant dai salms responsoriâi, p. 129.

O ben:

R. Aleluia, aleluia, aleluia.

Laudait il Signôr, parcè che al è bon,
parcè che il so boncûr al è par simpri.
Al è ben lâ a parâsi tal Signôr,
miei che no stâ fidâts sui umign.
Al è ben lâ a parâsi tal Signôr,
miei che no stâ fidâts su lis potencis. **R.**

Ti ai agrât parcè che tu mi âs scoltât,
e tu sês stât la mê salvece.
La pierre che i muradôrs le vevin butade di bande
e je diventade il cjantonâl.
A fâ dut chest al è stât il Signôr;
e je une robonone pai nestrîs vôi. **R.**

Benedet chel ch'al ven tal non dal Signôr;
us benedîn de cjase dal Signôr.
Tu tu sês il gno Diu e ti ai agrât;
tu sês tu il gno Diu e ti laudi.
Laudait il Signôr, parcè ch'al è bon:
parcè che il so boncûr al è par simpri. **R.**

SECONDE LETURE

1 Zn 3,1-2

O viodarìn il Signôr come ch'al è.

Cheste lezion e je fate di cuatri riis ma o varessin di fermâsi a ogni rie e a ogni pinsîr, tant grande e je la lûs che e splent culi. Ce nus disie in cûr la peraule: fis di Diu ? - nô o sarin sul so stamp ? - lu viodarìn come ch'al è ?

De prime letare di san Zuan apuestul

Miei cjârs, ce sorte di amôr che nus à dât il Pari: di jessi clamâts fîs di Diu, e lu sin pardabon! Se il mont no nus cognòs al è parcè che nol à cognossût lui.

Miei cjârs, nô o sin za di cumò fîs di Diu, ma no si è ancjemò pandût ce ch'o sarin. O savin però che cuant che lui si sarà pandût, nô o sarin sul so stamp, parcè che lu viodarìn come ch'al è.

Peraule di Diu.

CJANT AL VANZELI

Zn 10,14

R. Aleluia, aleluia.

Jo o soi il bon pastôr, al dîs il Signôr;
o cognòs lis mês pioris e lis mês pioris mi cognossin me.

R. Aleluia.

VANZELI

Zn 10,11-18

Il bon pastôr al rimet la vite pes sôs pioris.

Su chest vanzeli, pre Antoni Beline che in chescj dîs o ricuardin i undis agns de sô muart (Visepente, 23.04.2007), al à scritis meditazions colmis di spirtualitât, passion e poesie.

Gjesù al è il bon pastôr parcè che al à dade la sô vite par nô. Bogns pastôrs in zornade di vuê a son i milions di cristians perseguitâts (215 milions) o copâts (numar a no finî) sore dut tal Orient di mieç e in altris stâts so redut de Afriche e de Asie. Bons pastôrs a son lis personis che fra di nô a dan la lôr vite, te vite di ogni dì, par amôr dal Signôr e dal prossim. Bons pastôrs a son oms e feminis che te umiltât e tal cidin a servissin lis nestris comunitâts cence predi.

Intant che o sintin il vanzeli, cirin di viodi lis lôr musis dongje de muse dal Signôr.

Dal vanzeli seont Zuan

In chêt volte, Gjesù al disè: «Jo o soi il bon pastôr. Il bon pastôr al rimet la sô vite pes pioris. Il mercenari, invezit, che nol è pastôr e che lis pioris no son sôs, al viôt a rivâ il lôf, al implante lis pioris e al scjampe, intant che il lôf lis puarte vie e lis dispiert, parcè che al è mercenari e no si scompon pes pioris. Jo o soi il bon pastôr e o cognòs lis mês e lis mês mi cognossin me, come che il Pari mi cognòs me e jo o cognòs il Pari. E o rimet la mê vite pes pioris. E o ai altris pioris, che no son di chest sierai. Ancje chês o ai di menâlis dongje e a scoltaran la mê vôs e a saran un sôl trop, un sôl pastôr. Par chel il Pari mi vûl ben, parcè che o rimet la mê vite par tornâ a cjapâle di gnûf. Nissun no me cjol, ma jo le rimet di mê volontât. O ai il podê di rimetile e o ai il podê di tornâ a cjapâle di gnûf. Chest al è l'ordin ch'o ai vût di gno Pari».

Peraule dal Signôr.

Si dîs O crôt.

Su lis ufiertis

Danus la gracie, Signôr,
di indalegrâsi simpri cun chescj misteris di Pasche
in mût che ce che tu operis cence padin pe nestre salvece
nus fasi vê la gionde eterne.
Par Crist nestri Signôr.

Antifone a la comunion

Al è resurît il bon Pastôr ch'al à rimetude la sô vite pes sôs pioris
e pal so trop si è indegnât di murî, aleluia.

Daspò de comunion

Signôr, bon Pastôr, cjale cun voli di afiet il trop dai tiei fedêi
e indegniti di compagnâ tai passons de eternitât
lis pioris sfrancjadis cul sanc tant preseât di to Fi.
Par Crist nestri Signôr.

* * *

Riflession di pre Antoni Beline: Il pastôr e lis sôs pioris

Une parabule splendide, seben che cu la matetât e il sproposit tecnic di cumò, che al à copade dute cheste agriculture, si stente a capî ce rapuart che al pò vê un pastôr cu lis sôs pioris co no cognossin ni pastôr ni pioris, che no nd'je. Ma ai tims di Crist l'ativitât e jere di fonde e il pastôr al jere dut pes sôs pioris.

Si jere tal desert, li che la jerbe e jere misurade...

Vanseli par un popul, an B, p.75.

* * *

Cjants pal timp di Pasche

- Contait la buine gnove, *n. 66;*
- Crist nus da la sô lûs, *n. 158;*
- Victimae paschali laudes, *n. 159;*
- I cristians a cjantin laude, *n. 160;*
- Aleluia... O filii et filiae, *n. 161;*
- Sta legre, sante Glesie, *n. 162;*
- Christ ist erstanden, *n. 163;*
- Crist al è in vite, *n. 164;*
- Cristo risusciti, *n. 165;*
- Grosser Gott, *n. 166;*
- Al Agnel sacrificât, *n. 167;*
- Hvala veçnemu Bogu, *n. 168;*
- Te lodiamo Trinità, *n. 169;*
- Laudate Dominum, *n. 170;*
- O sin resurîts a la vite, *n. 171;*
- Benedete la zornade, *n. 172;*
- Il nestri Redentôr, *n. 173;*
- Si cjanti al Pari laut in cîl, *n. 174;*
- Nei cieli un grido risuonò, *n. 175;*
- O Cristo, sol di Pasqua, *n. 176.*

Salm 94 : Vignît, batìn lis mans al Signôr, *n. 256;*

“ **22 :** **Il Signôr al è il gno pastôr,** *n. 241;*

“ **80 :** Gjoldêt in Diu nestre fuarce, *n. 256;*

“ **92 :** Il Signôr al regne, *n. 258;*

“ **97 :** Cjantait al Signôr une cjante gnove, *n. 261;*

“ **113a :** Cuant che Israel dal Egjit al è jessût, *n. 265;*

“ **113b :** No a nô, Signôr, no a nô, ma al to non dai glorie, *n. 266.*

Tal libri Hosanna, si puedin cjatâ ancjemò altris cjants e salms adats al timp di Pasche.

* * *

A oms e feminis des nestrîs comunitâts cun / o cence predi:

E je une diviersitât di dons, ma un Spirt sôl;

e je une diviersitât di servizis, ma un Signôr sôl.

A ognidun i je dade la manifestazion dal Spirt pal ben di ducj:

un al à vude, dal Spirt, peraule di sapience;

un altri invezit, midiant di chel stes Spirt, peraule di sience;

un al à vude, simpri di chel Spirt, la fede; un altri il don di vuarê ta chel medesim Spirt;

un la virtût dai miracui; un altri il don de profezie;

*un altri ancjemò il disserniment dai spirts;
un altri la diviersitât des lenghis; un altri ancjemò la interpretazion des lenghis.
Ma dutis chestis robis al è simpri chel stes identic Spirt che lis fâs,
dividintlis a ognidun come che al vûl lui.*

1 Cor 12, 4-11

* * *

- * *I cjants, salms e cjantadis a vegnin ripuartâts cu la numerazion dal libri: Hosanna, Cjants e preieris dal popul furlan, Ed. Glesie Furlane, 2012.*
- * *Il cjant dai salms resposoriâi, Ed. Glesie Furlane, 2012.*
- * *50 corâi de cristianitât todescje voltâts par furlan, ed. Glesie Furlane, 2016.*
- * *Il libri des riflessions sul Vanzeli al è: pre Antoni Beline, Vanzeli par un popul, an B, Ed. La Nuova Base.*
- * *Par domandâ chescj libris scrivêt a info@glesiefurlane.org*